



Arkivnr: 2015/11453-54
Saksbehandlar: Adeline Berntsen Landro

Saksframlegg

Saksgang

Utval	Saknr.	Møtedato
Hordaland fagskulestyre		18.11.2016

Status og vedtak i samband med omstillinga til nye Fagskolen i Hordaland

Samandrag

I samband med samanslåinga av Bergen maritime fagskole og Bergen tekniske fagskole er det oppretta eit omstillingsutval (OMU) for omstillingsprosessen. OMU er eit rådgjevande organ og vart konstituert i møte 24.05.2016. Under OMU er det etablert ulike arbeidsgrupper som har fått ansvar for å undersøke og følgje opp tilhøve som er sentrale i omstillingsprosessen. Styret har tilsett ny rektor for Fagskolen i Hordaland, og etter dette er det utarbeidd ny leiarstruktur for den nye skulen.

Forslag til vedtak

1. Hovudadministrasjonen for Fagskolen i Hordaland skal vere i Haugeveien 28 på Nordnes
2. Styret tek saka til etterretning.

Svein Leidulf Heggheim
fylkesdirektør opplæring
ansvarleg for saksførebuing til fagskulestyret

Linda Farestveit
seksjonsleiar skule

Saksframlegget er godkjent elektronisk og har derfor inga underskrift.

Vedlegg

- 1 Samanslåing av Bergen tekniske fagskole og Bergen maritime fagskole
- 2 Organisasjonskart for Fagskolane i Hordaland
- 3 Leiarstruktur for Fagskolen i Hordaland

Fylkesrådmannen, 22.10.2016

I samband med samanslåinga av Bergen maritime fagskole og Bergen tekniske fagskole er det - som styret er kjent - med oppretta eit omstillingsutval (OMU) for omstillingsprosessen. OMU vart konstituert og hadde første møte 24.05.2016. OMU er eit rådgjevande organ som består av representantar frå leiinga, tillitsvalde og arbeidsmiljøutvalet (AMU) ved begge fagskulane. I tillegg er hovudverneombod og omstillingstillitsvald, samt regionleiar og fagskulekoordinator ved Opplæringsavdelinga medlem i utvalet. Bedriftshelsetenesta har også delteke på møte med OMU og gjev støtte til rektorane ved behov. Fram til ny rektor vart tilsett har OMU vore leia av administrasjonen ved Opplæringsavdelinga ved regionleiar. Etter at ny rektor vart tilsett for Fagskolen i Hordaland er det rektor som har teke over og leiar OMU.

I omstillingsprosessen har som nemnt rektorstillinga vore lyst ut, og Torbjørn Tvedt vart tilsett av styret som rektor for den nye Fagskolen i Hordaland frå 01.01.2017. Ny rektor har utarbeidd ny leiarstruktur for Fagskolen i Hordaland, og i etterkant av dette vert leiarstillingane lyst ut internt ved fagskulane (berre dagens leiarar kan søkje på desse stillingane). Vidare vert struktur og stillingsplan for stab og merkantil tilsette utforma og etablert. Dei tillitsvalde og AMU er heile tida involvert i drøftingar om desse prosessane. Det er ikkje forventa overtal i samband med omstillinga for fagskulen, men nokon vil sjølvstendig få endringar i arbeidsoppgåver.

OMU har oppretta fleire arbeidsgrupper som skal ivareta ulike prosessar i samband med omstillinga. Mellom anna er det oppretta éi arbeidsgruppe som har hatt dialog med NOKUT og Sjøfartsdirektoratet for å handtere vidareføring av godkjenningar og sertifiseringar ved den nye fagskulen. På bakgrunn av dette arbeidet er det sendt ut brev til NOKUT om ny organisering med kopi til Sjøfartsdirektoratet (vedlegg 1 og 2). I tillegg er det oppretta éi arbeidsgruppe for å vurdere endringar og eventuelle konsekvensar for lokale og økonomi i samband med samanslåinga, og éi gruppe som skal arbeide med endringar i høve til økonomi- og skuleadministrative system.

Styret har tidlegare bede administrasjonen ved Opplæringsavdelinga å vurdere kor hovudadministrasjonen for den nye fagskulen skal vere. Dette er drøfta i OMU, og det er naturleg at hovudadministrasjonen vert på Nordnes ved dagens Bergen tekniske fagskole. Nedre Nygård vert soleis ein studiestad for dei maritime og petroleumstekniske utdanningane. Val av Nordnes som hovudadministrasjon er mellom anna naturleg av di det ikkje er ledig areal ved Nedre Nygård til ein eigen administrasjon for Fagskolen i Hordaland, og av di det er flest studentar og utdanningar på Nordnes.

Ny leiarstruktur

Som nemnt har rektor utarbeidd ein ny leiarstruktur for Fagskolen i Hordaland (vedlegg 3). Den nye leiarstrukturen er nøye gjennomtenkt i høve til faglege og administrative synergjar som var eit av hovudmåla for samanslåinga. I høve til administrative synergjar syner den nye leiarstrukturen at det vert etablert ein fagstab under rektor. Fagstaben skal mellom anna ha eit medansvar for å sikre god kvalitetsutvikling i samband med kvalitetssystema; ivareta føresegnar i lover, forskrifter og avtalar. Ein fagskule er eit sjølvstendig skuleslag som sjølv har ansvar for utvikling og vedlikehald av eigne studieplanar, og studieplanar vert ikkje utarbeidd av eit direktorat som i vidaregåande opplæring. Krava til å vere godkjent fagskule er aukande i høve til oppfølging av grunnleggjande føresetnader som systemdokument, studieplanar, kvalitetsutvikling, dokumentasjon og rapportering. På bakgrunn av dette er det eit viktig grep for Fagskolen i Hordaland å etablere ein dedikert fagstab, også med tanke på å skulle søkje NOKUT om fagområdegodkjenning.

I høve til faglege synergjar vil samanslåinga gje styrka fagmiljø med nye konstellasjonar. Mellom anna er det mogleg å etablere nye avdelingar der dei ulike utdanningstilboda i større grad har fagleg samanheng enn før. Døme på dette er maskinoffisersutdanninga og maskinteknikkutdanninga som i dag ligg ved kvar sin fagskule, og som har fleire faglege overlappingar. Petroleumsutdanningane og prosessutdanningane er også døme på tilbod som i dag er ved kvar sin skule og som har faglege fellestrekk. Såleis er det lagt vekt på å etablere avdelingar som har fagleg likskap, og som har avdelingsleiarar med god fagkompetanse innan dei aktuelle fagområda. Tabellen under illustrerer avdelingsstrukturen ved dei to noverande fagskulane samanlikna med den nye avdelingsstrukturen (fagstab er ikkje med i tabellen).

Bergen maritime fagskole	Bergen tekniske fagskole	Fagskolen i Hordaland
Leiar	Leiar	Leiar
Boring	Bygg	Elkraft
Havbunnsintallasjonar	Maskinteknikk	Automatisering
Oppdragsverksemd	KEM	Oppfølgingsansvar Stord
Leiar	Leiar	Oppfølgingsansvar Arborist
Maskinoffiser (og maritim vgs)	Elkraft	Leiar
Leiar	Automatisering	Bygg
Dekksoffiser Bergen	Prosess	KEM
Dekksoffiser Austevoll	Oppfølgingsansvar Stord	Anlegg
Leiar	Leiar	Leiar
Administrasjon	Anlegg (Voss)	Dekksoffiser Bergen
	Leiar	Dekksoffiser Austevoll
	Arborist (Hjeltnes)	Leiar
	Leiar	Maskinoffiser (Nedre Nygård)
	Forkurs til ingeniør	Maskinteknikk (Nordnes)
	Meisterbrev	Leiar
		Boring
		Havbunnsintallasjonar
		Prosess
		Oppdragsverksemd
		Leiar
		Merkantil (Nedre Nygård og Nordnes)
		Leiar
		Forkurs til ingeniør
		Meisterbrev

Det er også lagt vekt på å ha avdelingar som er noko lunde jamnstore i høve til tal på tilsette og utdanningstilbod. Dekksoffiseravdelinga skil seg noko frå dei andre avdelingane i både storleik og tal på tilsette. Årsaka til dette er at denne avdelinga består av to studiestader der leiar har personal- og økonomiansvar for begge, og det vert rekna ei del reisetid mellom desse stadene. Dei andre avdelingane som har studiestader under seg utanfor Bergen har eigne stadlege representantar med personalansvar.